

四庫全書

集部

欽定四庫全書

集部

鄱陽五家集卷一

詳校官監察御史<sub>臣</sub>孫家賢

主事銜<sub>臣</sub>徐以坤覆勘

總校官知縣<sub>臣</sub>繆琪

校對官編修<sub>臣</sub>沈清藻

謄錄監生<sub>臣</sub>王耘

欽定四庫全書

集部八

鄱陽五家集

總集類

提要

臣等謹案鄱陽五家集十五卷

國朝史簡編簡字文令鄱陽人是編輯其鄉人之詩自宋末至明初凡五家一曰芳洲集三卷黎廷瑞撰廷瑞字祥仲宋咸淳辛未進士授迪功郎肇慶府司法叅軍二曰樂庵遺稿

二卷吳存撰存字仲退延祐元年舉於鄉官  
至饒州路都陽縣主簿三曰松巢漫稿三卷  
徐瑞撰瑞字山玉號松巢宋末入元初人嘗  
為都邑書院山長集末附其從子孜詩三十  
六首曰仰山集四曰寓菴詩集二卷葉蘭撰  
蘭字楚庭號醉漁元太常禮儀院奉禮郎明  
太祖召之投水卒末附葉德新僅存詩一卷  
德新名懋蘭之父也元時官嘉興路總管五

曰春雨軒集四卷劉炳撰炳字彥昂明初任  
中書典籤出為大都督府掌記所錄以詩為主  
間亦載詩餘及雜賦考五家之中惟彥昂  
全集有傳本已著於錄其餘四家及所附錄  
則刊本殊稀頗賴此刻以存其詩大都諧雅  
可誦非誇飾風土濫盈卷帙者比也葉懋為  
葉蘭之父而其詩附刻蘭詩後蓋用黃庭堅  
集附刻伐檀集之例今亦姑存之焉乾隆四

十五年六月恭校上

總纂官臣紀昀 臣陸錫熊 臣孫士毅

總校官 臣陸費墀

欽定四庫全書

鄱陽五家集卷一

鄱陽史簡編

宋黎廷瑞芳洲集一

公諱廷瑞字祥仲生而穎拔日誦數千言即了大義少長聞樂平謹齋吳公中守隼軒吳公中行以雙峯饒子之學講道於龍湖公躡屨從之深契旨要由是為文一宿於理咸淳庚午與計偕辛未奏

名禮聞知舉刑部侍郎方公逢辰殿中侍御史曾  
公淵子見公所為文貫穿出入沈鬱典據意必老  
於場屋者及謁謝使之年曰某甲生二十又二年  
矣皆嘆息久之紹陵親策賜同進士出身授迪功  
郎肇慶府司法參軍需次未上癸酉丁外艱家貧  
資束脯以給葬服平將調玉改鼎移幽居十稔以  
文墨自娛種梅藝菊雅意丘壑而北方士大夫之  
來南者聞公名莫不願見既見歡如平生竹庵與



屯公希魯疎齋盧公摯竹居姚公燉廉問之日以  
歌詩樂府相唱答竹庵巡行郡屬必與公同行所  
至擊強鋤奸如雷霆風雨咸謂神明公益有力焉  
至元丙戌按察副使五善王公懋至番會郡博士  
以疾不任職諸生以請王公檄公攝教事公始出  
受事賓禮者英激揚後進佩衿俎豆彬彬有承平  
風時有以學校羨利言於朝者上命有司程出內  
吏率刻急析及秋毫列郡文學至破產以償不給

公獨從容酬應不屑色辭多士困於役公每至公  
府力爭之不申其說不止自丙戌至庚寅凡五載  
改創采芹宮愛蓮亭葺尊經閣不一事嘗種竹閣  
下紀之以詩比代去綠色猗猗光照几席公於是  
有遺愛矣異時右轄五峯燕公公楠知公最深以  
公姓名剡上公語其人曰阿婆老矣吾菽水溫清  
惟日不足而暇從人間事乎卒不報始治第於先  
廬之南虛中堂以奉春暉晚取居易俟命之義更

號俟庵彈琴著書高歌永嘯洞視今古意氣浩然  
自賦閒居三樂曰讀書曰會友曰游山其言淡而  
不厭淨而不污趣尚遠矣太夫人終公哀瘠殊甚  
饘粥未食焦勞旦暮逮髯髮頓白公生平倜儻  
豪逸雅慕李太白杜牧之為人所友皆四方名勝  
士居家常致千里外客客至不問家有無必延款  
彌日談笑竟夕有急赴之必為盡力無德色或負  
之亦終身不復言為文必黜百家崇孔氏以韓子

為宗尤酷嗜歐陽子不用奇字生語而幽然之光  
蒼然之色絕出筆墨畦徑外詩尤神解自成一家  
馳騁唐宋以還深入陶謝之室氣韻雄渾趣味深  
永蓋不獨專美一時矣至大元年戊申夏公卒餘  
干養吾李先生謹思以書語吳仲退曰悲哉辛未  
以後出語天拔不煩繩削而自合有如斯人者乎  
胡文友愕有詩曰鄱陽四月十一日優鉢曇花枯  
一株二公之嘆蓋皆為斯文嘆也

四言體

送梁必大歸杭省親

楚水送梁子也梁子為楚文學掾將歸覲親其友念別故

作是詩以送之

悠悠楚水靄靄吳雲孰作之合胡然而分豈無良朋我  
獨子忻於穆令德有粲其文

吳雲靄靄楚水悠悠眷念庭闈道阻且修為貧而仕匪  
食孰求曷不偕來以解爾憂

瞻彼日月有望有弦慨彼中年別友實難有芹於池有

芝於山式遄其歸勿遠其還

五言絕句

李泌二首

錄二首之一

一副黃臺話離離詠種瓜都來三十字救得兩官家

肅宗

殷建寧王有諷廣平王者李泌舉黃金臺瓜辭云云今  
陛下已一摘矣慎勿再摘廣平王代宗也德宗欲廢太  
子立舒王李泌再三  
舉此以諫順宗獲全

食新有感

盡道豐年好停食意惘然離離洛都黍莽莽建州田

題趙氏曉山

旦氣烟清明曙色淡空淨悠然見青山盡見天地性  
煙雲亂晝陰雨電交晚風道人定眼觀祇與清曉同

張良

博浪揮椎處惓惓報國仇如何銷印事獨不為韓謀

七言絕句

鳳凰臺二首

汨落零陽酒一杯赤藤遺墨亦堪哀蒼梧雲去簫聲冷

金史四庫全書  
卷一  
莫是當年也誤來

三山二水年年在向日浮雲處處多  
醉拍欄杆呼李白  
東風吹雨下新河

半山寺謁謝太傅像

狐精解唱桂枝香一曲中洲禾黍黃  
辨得蒼生謝安石

東山絲竹又何妨

馮深居題北山閣云却是後生王介甫不曾携妓浣東山

舟行

深深人語轉蒼崖  
牽路如梯滑似苔  
睡起擁篷看奇石



一方新綠入船來

寄龍山譚使君五首

今錄四首

萬里雲濤海嶠秋  
倩人扶上黑雲兜  
一簾新雨西樓晚  
卧聽烏衣說舊愁

流離遷徙古今同  
澹沲青山往事空  
四壁蟲聲秋思苦

夢中猶自奏幽風

使君嘗夢與故參政留遠  
魯公按樂章曰此幽風也

霧閣雲牕罨畫開  
半栽松竹半栽梅  
不須更種桃花樹  
怕引漁郎入洞來

題徧寒巖古佛廬唐人詩句晉人書

吾鄉法雲寺使君多題詩

山靈

亦恨無清福消得君侯此卜居

使君始欲卜居吾鄉

### 夜坐

梧桐月轉影翩翩竹屋抄書夜未眠林下不知秋遠近  
西風一葉墮燈前

### 湖上夜坐二首

露坐空庭竹四圍夜深更不掩柴扉茫茫雲海月未上  
蒼耳滿園螢亂飛

平湖漠漠來孤艇  
遠樹冥冥見一燈  
翁媪隔籬呼稚子  
岸頭猶有未收罾

午坐偶成

日高篁竹門長掩  
春晚蕪青花亂開  
寂寞更無人問字  
一雙蝴蝶雨中來

揚州遇雪呈祝靜得二首

玉珮珊珊怯暮寒  
青宵夜半躡飛鸞  
真妃似念尋芳晚  
別剪瓊花與客看

六合沉冥四壁空夢魂只遶楚雲東  
明當掛席黃天蕩  
卧看茫茫柳絮風

落花

紅雪霏霏入燕泥朝來猶是可憐枝  
春風葵麥玄都觀  
可是劉郎見事遲

飲百花洲四首

北嶺尋花雲繞屐東湖載酒水平船  
舊游零落今餘幾  
回首春風十二年

湖山幾度少年游散髮吹簫坐小舟  
秋髻蒼蒼春樹碧更堪重過百花洲

桃花繞屋竹參天曾向湖西住五年  
回首但餘葵麥在古今何必更桑田

歸鴉澹澹夕陽閒窈窕樓臺紫翠間  
說向城中應不信隔湖最好看芝山

東湖詩十首

今僅存三首

游絲窈窕織春暉楊柳人家半掩扉  
一片暖雲篩雨過

杏花疎處見鶯歸

梅徑苔花長菜衣  
仙翁跨鶴不曾歸  
五陵年少無聊賴  
幾陣風鈴放鴿飛

萬頃湖波水渺茫  
兩堤新綠柳絲長  
晚來疎雨浮鷗外  
何處漁郎泛小航

田家

陌上青裙跣送茶  
籬根白髮卧看家  
山禽不語簷陰轉  
一樹輕風落柿花

山行二絕

杖藜窅窕更崎嶇黃葉漫山路欲無  
小屋低煙長短竹  
曲塘斜日兩三鳬

野老相過一笑迎黃雞白酒愧深情  
山空日落早歸去  
昨夜隔籬聞虎聲

客舍

門前蒼耳與人齊屋後青蛙作鬼啼  
風雨瀟瀟天正黑  
披衣不寐聽鳴鷄

大雪過花子峯下有懷仲退南翁蕪簡志上人

詩人得意吐還休長要胸中此境留千載風流今始解

剡溪夜半有行舟

仲退嘗有詩云塞驢昨日雪濛濛破帽呼舟古渡風吟得詩成還未吐要

留此景著胸中余深愛之

閣下溪流閣上山溪山正好此時看絕憐孤負臨風約  
輸與山僧獨倚闌

九日二首

錄其一

山下驚天動地雷山頭聽得似嬰孩幾回看盡人間世



只好登高莫下來

予舊遊白鹿洞坐看書臺風泉四面松聲萬壑去  
三十年猶在吾耳

風泉吹滿看書臺洞口松聲萬壑哀幾度倚闌聽不足  
請君琴裏寫歸來

雨後過東山

二首錄一

羸驂破帽約輕寒破費春風半日閒一事無成年四十  
又隨花柳過東山

山行

二首錄其一

籃輿一路野梅風  
午酒濛濛困未鬆  
側首松梢聽晴哢  
數峯殘雪夕陽中

病目

二首錄一

兩眼誰憐著古今  
中年贏得淚沾巾  
冥鴻滅沒看天曉  
搔首熏風對玉琴

王子猷

東晉諸公富貴痴  
風流千載使人悲  
子猷欲作袁安卧

還有閒情適剡溪

過馬當祈風已卯

獨倚危檣數過鴻  
家山渺渺楚雲東  
吟情不到滕王閣  
只乞歸帆一日風

楚翁別五年丙午四月來山中  
風雨數日因話舊  
作再賦三絕  
僕與楚翁至是三聽雨矣  
不知自此  
又幾聽雨耶

舍前舍後竹冥冥  
山雨瀟瀟徹夜聽  
還似當年談舊夢

兩翁相對一燈青

五載期君君不來悠悠世路忽相猜從今無事長相見  
縱使百年能幾回

三千年待桃花結五百歲還銅狄磨我輩相期非旦暮  
五年離別未為多

新城宴集夜歸

獵獵天風吹酒醒茆茨籬落尚燈明梅花屋背無人見  
殘角疎鐘雪一城

清溪許希賢自號拙逸為賦四絕

結繩已是散洪濛書契紛紛日更工無極已前誰得似  
一簾草色自春風

瓜果蛛絲五綵針年年兒女費精神世間巧盡天無巧  
更要如何巧與人

能言鸚鵡鎖金籠夜夜家山桂子風羨殺雙鳩有閒福  
相呼相喚柳陰中

莫笑區區老漢陰桔槔省力却勞心甕頭別有天機在

金定四庫全書  
卷一  
春雨半畦新綠深

次韵張龍使君十絕

今錄三首

泠泠流水山圍洞漠漠桃花春閉門  
蛇去馬來多少夢  
桃源還是舊乾坤

雨餘秧馬各相先  
綠蒲平疇斷復連  
喜得人間機事息  
桔槔閒在槿籬邊

塵裏一籠天地窄  
樓頭萬幅水雲寬  
何當化作千年鶴  
却伴遼東管幼安

端午東湖觀競渡

二首錄其一

記得當年年少時  
蘭湯浴罷試新衣  
三三五五垂楊底  
守定龍舟看不歸

贈山翁

浮雲鬱鬱成蒼狗  
黃鵠高高化白鳬  
惟有大程窺此妙  
不將筭法問堯夫

杜詩云黃鵠高於五尺  
童化為白鳬似老翁

五言近體

丁丑元夕

金史四庫全書  
卷一  
娟娟條風至悠悠挂影升  
黃昏村市鼓紅日社林燈節  
序更悲樂乾坤幾廢興  
龍城舊游處說著淚沾膺

戊寅人日

滿飲東風酒悠悠自醉眠  
英雄悲往運兒女樂新年  
楊柳嬌無賴梅花老更妍  
半窓晴日晚歌枕聽春鶯

贈地理方生

桑田還變海深谷或為陵  
物化全難料山經果可憑  
小溪春綠遶新樹午陰層  
且了登臨事風煙擁瘦藤



入夏

入夏纔幾日新晴已不禁  
闌珊花晚景掩映樹初陰  
西照山河影南風天地心  
物情殊可笑團扇已駸駸

聽琴

虛籟起還休輕絲斷復抽  
鬼啼湘竹雨木落洞庭秋  
因子作浙操令人悲楚囚  
蒼桐不可叫杳杳暮雲愁

江行

卷緯崖形斷開帆浦意孤  
長天低去鳥落日蘸平湖  
渺

渺千年夢悠悠萬化途倚蓬成晤嘆漁唱在菰蒲

### 新亭

不復新亭泪其如感慨何北風吹草木西照滿山河王  
謝聞孫少蕭陳短夢多庭芳搖落盡江上有漁歌

### 聽琴

淒涼烏夜啼怨抑雉朝飛有室寧非願無枝可得依天  
涯心獨苦歲晚淚頻揮莫作將歸操風塵久念歸

### 社日飲烏衣園

夜夜桃花雨年年燕子春同傾社日酒還憶故園人孤  
塔蒼烟迴空堂翠草新醉歸還自笑吾亦素衣塵

故宮

麥飯苦經營桑田許變更饑鴉啼古井獨鶴下荒城落  
日開河迴東風草木榮蒼蒼十二檜顏色尚永平

甲子雨次日清明

政須晴甲子早作雨清明萬樹朝烟濕一溪春雨平農  
謠若果驗歲事已堪驚天意非人料西疇且力耕

輓王水監

庾嶺梅千樹貪閒不肯看  
鳬歸玉棺下鶴去碧桃寒

七月

七日

海嶽遺文在乾坤  
短夢殘蓬萊都水監應復署仙

官

聞蛙

族處汙池底氣張新雨餘  
交交還閣閣疾疾更徐徐  
別製鼓吹曲自吟蝌蚪書  
道人喧寂等歌枕到華胥

湖上觀螢

依依起草際煜煜點荷心應是地生火得非天雨金神  
奇出臭腐光怪發幽陰莫說太陽近明蟾已不禁

六月郡庠尊經閣前種竹三得雨書喜示同舍

移種來數日三沾沛雨恩雷公念同族

易震  
說卦

龍伯愛諸

孫鞭活金髯走捎寒翠鬣翻拂雲吾所望好為護霜根

題李子厚萬梅

樹樹都吟徧須還千億身未應分寸地能著許多春丈  
室來諸佛懸珠內衆真閉門參此妙一笑月痕新

視獲

漠漠稻梁稀紛紛鳥雀飛  
吾田空竭力汝族更求肥  
舌在談何用躬畊計又非  
悵然還獨笑落日掩郊扉

江行阻風

遠涉仍多病那堪正蘊隆  
黃沙吹白浪赤日照青楓  
天地支頤內江山散髮中  
一涼端足快莫恨打頭風

送族兄太初再遊廬山

家山豈不好更欲訪廬君  
應意麋鹿友其如鴻雁羣  
江

湖秋渺渺道路雨紛紛歲晚成歸否高山有白雲

高山  
太初

居所

雨中旅懷

驟雨半日許新泥一尺餘鵬鴒憂我馬杜宇愛吾廬問  
宿忻逢竹停殮遲買蔬明朝踏歸路晴霽定何如

過鎮巢

過盡黃蕪岸開橋小雨時城居懸似燕山勢縮如龜歲  
旱圩田薄天寒土屋宜呼童沽白酒巢口賽新祠

卷一  
答客問

錫號脩閒客山中管白雲自稱前進士人喚故參軍花  
影供吟課茶香策睡勲客來談外事去去不煩君

晉元帝廟

不知牛繼馬却道馬為龍得士能成帝生兒不亢宗荒  
祠煙樹晚殘碣雨苔封往事憑誰問春城起暮鐘

病歸

渺渺江淮夢還持一笑歸遠遊諳世路危病得天機慢



火煎涼藥清泉浣暑衣閉門謝來客不是客來稀

被葛

被葛起視夜悟心正露零浮生多夢境幽客獨中庭星  
斗三更動天河萬里橫尋秋無覓處四壁但蟲聲

登鄱江樓

江城一登眺寒色有無間帆拂沙頭樹僧歸雲外山樓  
高西照急葉盡北風閒世事何時足悠悠飛鳥還

歲晏

歲晏甘離索山扉午不開凍蜂粘病菊饑雀啄疎梅  
睡拋書冊清齋遠酒盃殷勤謝塵客無事莫頻來

送史水東訪餘干張千林

史庚午  
與予篤

永夜一燈青相逢話苦心悠悠拾翠夢嫋嫋採芝吟小  
雨黃花健西風荷葉深何須笑搖落春意在山林

送友遊淮

君行不少住明日是清明驛路垂楊暗淮河新水平天  
晴紆野興地迫暢離情故友如相問深山戴笠耕

樂平樊主簿捧檄北行來別賦此奉餞

拊字心空悴清寒節太高無人相料理惟我獨賢勞萬里隨歸雁孤帆渺暮濤歸期應不遠新月點梅梢

上灘

歲月川流駛風霜行路難忽聞喧怒瀑始覺上層灘月落雞聲曉沙空雁夢寒雲林搖落盡敢卜一枝安

船尾夜坐

船尾夜深深無人伴苦吟萬山黃葉夢一路早梅心度

金匱山房詩集 卷一  
緯驚村犬移篙動水禽誰家搗衣急殘月數砧聲

新城呈王明父明日立春

晚歲寒無力新晴雪未消江聲連去雁燈影見來潮野闊鄉心遠風高客夢遥梅邊有新意明日是春朝

贈畫龍章道人

幾載湖中住歸來筆有神青天雙劍氣破壁一梭塵舉世惟看畫何人更識真千巖冰復雪雷雨動青春

夜泊城下大風雨友人約明日遊芝山

沉沉春夜黑寒客泊孤舟  
天漏雨平下風回水倒流  
千戈吾道在宇宙此生浮  
明日還晴雨芝山要一遊

宿界首寺施府墓園也次孟使君壁間韻三首

今錄

一首

沙路抵長夏入山如早秋  
閒房容客卧老屋欠人修  
日

落蟬多事雲深鶴自由  
風塵二十載復此得清遊

二十年前

去遊此寺甚嚴

晚泊舒城下

卸帆淮南岸城樓欲鼓天遠山雲似雪近水屋如船樹  
意紅未了波光綠可憐乾坤無限事一笑白鷗前

七言近體

淮南聞雁呈何復初同年

孤棹翩翩北渡淮相逢一笑意悠哉關河萬里忽秋晚  
風雨五更聞雁來好夢驚回頻輾轉壯心平盡復崔嵬  
吾生通塞寧須計但祝乾坤泰運開

有為余推數者  
謂晚始得泰卦

金陵歲晚

不擬殘年住秣陵  
摩挲蠟屐笑平生  
茫茫去雁雲千里  
渺渺疎鐘雨一城  
天地無情催歲月  
古今何物是功名  
梅邊且喜春風近  
痛飲挑燈坐到明

思歸

目斷飛雲思黯然  
獨携樽酒杏花前  
清明寒食能多雨  
白下長干又一年  
萬里風沙憐雁去  
滿村桑柘憶蠶眠  
家書寫就無歸使  
欲問江頭上水船

巢湖阻風夜起觀天

流行坎止信悠然又泊湖東兩日船客裏風光忙似轂  
夢中歸路直如絃西風渺渺方搖夜北斗離離正掛天  
寄語龍魚莫相戲向來此地亦桑田

寄朱野翁蕪簡月觀陳同年應子

相逢淮楚各淒涼笑殺三生杜牧狂萬樹鶯花春對酒  
一燈風雨夜連床停雲渺渺思何極大塊茫茫夢正長  
若見元龍相借問為言歸去學耕桑

里中社



蘇石莓牆屋數楹年年來賽社公靈兒童趁節懽如沸  
父老傷春涕欲零海燕邊鴻何日了夏松殷栢為誰青  
村醪如蜜猶堪醉莫遣東風兩眼醒

金陵別程萬里教授

西風一笑鳳凰城夢裏相逢各自驚白日共傳蘇軾死  
故人寧料范睢生平居慕悅空閭巷急難周旋如弟兄  
別去各為千載計隋珠彈雀不須輕

蕪湖吉祥寺

寺創晉永和間李昇避難此山後得國改永壽  
宋景祐中賜今名寺中燬有僧餘者來法鼓自  
鳴道場復興又邑人解牛三夕不能奏刀牛見  
夢曰當送我吉祥遂送寺供麥磴山谷作碑紀  
事晁无咎篆額今寺荒涼特甚好事者時時打  
碑不絕

刹院年來正勃興此山更不及承平全無估客開囊施  
猶有殘燈逐鉢行晉殿唐宮牛一夢黃書晁篆鼓常鳴

摩挲古柳成三嘆歲歲東風綠自榮

丞相馬輓章

平生甚似洪文惠

公自謂平生祿位出處似洪文惠公

暮景惜不如盤洲

纖兒何人竟悞晉

公有詞云東晉纖兒撞壞業令人間受禍

大夫此日空非

周長夜漫漫不復旦芳草淒淒其奈秋

公自號玩芳病叟

遺書

墮淚付千載往從后軒雲間游

阻水寄友

綿綿風雨暗西牕悶擁殘編對夜缸稚子何知泥污土

良朋共嘆陸成江負山鰲重應將壓戰野龍驕未易降  
此去城東無百步明當相就一漁艘

夜坐風雨忽至

山中夜半風雨來板扉竹戶如人開孤燈淡淡吹欲死  
飢鳥啞啞啼更哀青陽甫達諸火滿素志無伸華髮催  
於虜聞道亦未晚策驥千里毋徘徊

癸巳七月送姚廉訪移司金陵二首

錄其一

十載孤懷鬱不開二年談麈得重陪亦知久聚難為別

縱復相逢有此回野老共遮驄馬路仙翁合管鳳凰臺  
慈湖相見如相問

謂年魁  
陳宜之

已約鍾山採蚤梅

### 院口寫望

短艇搖搖對晚屏推蓬念遠不勝情風前落木心猶壯  
雨後歸雲氣未平湖汊條條新築塞圩頭處處薄收成  
道逢遺老頭如雪細聽尊前說舊城

### 九日浮梁有約登高者以病不赴

老樹荒城噪暮鴉淒涼節氣滿天涯絕憐多病相疎酒

又是重陽不在家  
浮世光陰易紅葉  
秋籬晚節復黃花  
閉關寧負登高興  
莫遣西風戲孟嘉

歸來

幸未緇塵染素衣  
歸來既避北山移  
田園有味閒方覺  
道路多岐晚始知  
栗里新街五柳傳  
花蹊舊業四松詩  
少游歎段猶嫌累  
到處風塵藤一枝

渺渺皋蘭遠路漸  
靈龜何必為余占  
還家早似千年鶴  
乖世元無六月蟾  
元叟為官猶號漫  
陶翁未仕已名潛

吳人終未諳羊酪剛道蓴羹似蜜甜

庚寅元夕月當蝕雨作不見明日奚相士索詩書  
此

月中八萬四千宮不管妖蟊啖老瞳白兔藥成無用處  
墨龍雲上有奇功且忻玉宇瓊樓在莫恨銀花火樹空  
自古庚寅多此事煩君擡眼相蒼穹

江上夜觀野燒

坎離血戰夜茫茫萬里陰飈更助狂兔窟那知炷郿塢

蟻封不料火咸陽三更月起雲霞曙九野冰凝雷電光  
莽莽黃茅寧暇惜莫教薰著早梅香

題胡氏南園精舍

平泉竹石墮荒蕪

李德裕  
居平泉

金谷池臺莽廢墟今古茫茫

竟誰屋乾坤吶吶有吾廬溪山圍座醉留客燈火隔林  
聞讀書此樂輸君先一著故園吾已賦歸與

花時留郡歸已初夏即事六首

黃塵兩鬢欲蒼華歲歲東風不在家不學郭駝歸種樹



却隨劉跛去看花浮名未值蒲萄酒晚味思叅橄欖茶  
縹緲風烟新綠起村南村北已桑麻

正是花時坐弗邀出門新綠滿江皋池塘灩灩鳴姑惡  
草樹陰陰度伯勞宿酒轉添胸磊砢遊絲欲亂鬢蕭騷  
西疇昨夜春膏滿免得人間費桔槔

從來麋鹿合山林無奈迂疎習已深食用且空猶種秫  
典書未贖更修琴少豪論事唯捫舌晚靜觀空頗得心  
莫笑山翁無事業種花時竹自成陰

心鏡翛然澹似僧悠悠觀化寄枯藤雲來雲去閒舒卷  
花落花開小廢興吹笛強呼從百里種瓜清隱學東陵  
野人知有觀書癖遠餉松肪續夜燈

山中幽興儘無窮不管蕭蕭四壁空漸覺愚巾便暑戴  
元次山暑則受愚巾偶逢賢酒亦時中映堦草色帶朝雨隔屋筍  
香吹晚風搔首南窓有奇事綠楊初破石榴紅

多年不訪鳳山春清賞歸時肯見分伏虎移來湖上石  
瑞龍飛下海南雲眼根磊落祛塵翳鼻觀清虛發妙聞

坐對翛然誰與語綠陰蝴蝶自成羣

鳳山朱公尚書堂名理皇宸翰朱尉

近惠奇石二株海龍香十九余時正病目

### 送李性夫赴召時李以端午采藥後行

蜃沉海底氣升霏消得皇皇四牡馳此去玉堂成故事

未應金馬待多時願儲救世三年艾更采銷兵萬歲芝

萬歲蟾蜍名肉芝陰

特報明時端不負古今良相即良醫

### 春意郊行

二首錄一

卯酒醒來欲午天意行平陸自悠然近山欲雨有遠意

老樹得春還少年蝶化不知何宇宙蝸爭難到好林泉  
令人長羨崆峒叟萬壑松風打晝眠

淮南夜泊

低篷矮艇載詩翁又泊淮南港汊東月黑荒村行獨虎  
雲深遠渚拍低鴻詩書落落心如梗天地悠悠鬢欲蓬  
輾轉孤衾無限恨客中此夜與誰同

和張君春晚圖

知道芳菲只恁休也應秉燭及春遊來牛去馬乾坤老

舊燕新鴻歲月流千里空勞芳草夢一樽聊慰落花愁  
桃源只在扁舟外說著仙郎却繆悠

歸米

曾奏明光忝末科青山回首已霜荷偷生甚媿秋胡婦  
拊事總成春夢婆早慕功名成事少晚談空妙得心多  
斜陽一曲歸牛背笑殺南山白石歌

過采石懷太白

騎驢花縣不相容却駕長鯨戲遠空采石釣船還夜月

青山破墓幾秋風平生賞識惟狂客他日功名付令公  
千載英雄長不死長庚光徹紫霄中

送人之淮南

淮南稍覺故人稀幾度拏舟願輒違王粲去鄉應有恨  
邠原避地豈無依稻迷絳國鴻初下酒滿江城蟹正肥  
想見臨風重回首芝山日日白雲飛

次韻荅王子賢所寄五首

今錄三首

釣竿閒却下漁磯采采香芹不自肥舉步毫釐千里錯

回頭四十二年非已將明鏡悲華髮更遣緇塵染素衣  
飢食肉糜應是好倚門日日望兒歸

牛奮箕張謗易生更堪枉矢與撓搶五窮繾綣奴休送  
三至倉皇母亦驚逸少自慚君有誓李期誰謂爾孤鳴  
東風吹盡芝山雪畧放梅花一樹明

夜讀新詩重惘然絕憐塵土過年年月供那有千壺俸  
日費元無一塊錢龐老何心更城府陶公素志只園田  
桃源不在乾坤外欲問漁郎覓釣船

九月六日發舟齊山下呈祝靜得蔡君瑞

齊山山下泊扁舟尚想三生杜牧將南雁喚回千載夢  
西風掃碎一江秋黃花落落如相逼嘉節匆匆也合酬  
准擬我眉亭上去買魚沽酒浣羈愁

金陵陳月觀同年三首

已是收枰斂手時更堪拈起著殘棋露盤不解相如渴  
桃實難克曼倩飢吾末如何真已矣是知不可復為之  
令人長媿商山叟四海清夷只茹芝



深衣社裏強婆娑，悞了東臯雨一蓑。  
麟也可為宣父泣，鳳兮須信接輿歌。  
懷金暫樂憂方大，投璧能全碎已多。  
此去修行留得力，世間知己是天魔。  
寓菴集載此首題為漫興  
莫道桐花揀實清，比量腐鼠不堪爭。  
鬼應勿復擲揄汝，人亦真難駕馭卿。  
夫子何心求狗監，穉郎到處有魚羹。  
白雲滿地江湖濶，著我逍遙自在行。

九日雨遊薦福寺

二首錄其一

小淪孤亭興未闌，共為長歲坐蒲團。  
半林空翠濕晴露，

滿院秋香吹晚寒  
弔古并捫碑字讀  
好奇更借藏經看  
歸舟莫笑清狂絕  
得句從來勝得官

還家二日聞征西軍馬來  
人家俱避地寒食獨酌  
有懷諸君

閉戶雲山轉盡長  
祇消如許送清光  
一百六日柳邊綠  
五十三年頭已霜  
賴有孤斟聊勃鬱  
惜無共語慰淒涼  
前時溪上行春處  
想見家家避地忙

送朱瑞卿

安慶人

長憶揚州笑口開，扁舟何意子能來。  
居然一別又三載，如此相逢能幾回。  
春色漸歸千古樹，雨晴猶有隔年梅。  
歸帆不泊無邠水，少駐東風領一杯。

梁必大歸自燕山有詩問訊以詩答之


折柳空驚歲月徂，寄梅欲憶雪霜餘。  
君看天上煙花繞，我伴山中木石俱。  
婚媾駸駸難辨老，友朋往往不如初。  
極思一見論心事，城府年來跡漸疎。

余秋村創書院

五鳳樓修謾賦空不堪四壁老秋風黃金白壁相逢頃  
文杏香茅一笑中子美堂資須錄事

子美花溪之堂裴冕力資而成之

堯夫宅契出溫公諸公更使風流盡千載遙知意氣同



鄱陽五家集卷一

欽定四庫全書

集部

鄱陽五家集卷三

詳校官監察御史<sub>臣</sub>孫家賢

主事銜<sub>臣</sub>徐以坤覆勘

總校官知縣<sub>臣</sub>繆琪

校對官編修<sub>臣</sub>于鼎

謄錄監生<sub>臣</sub>張霖

欽定四庫全書

鄱陽五家集卷二

鄱陽史簡編

宋黎廷瑞芳洲集二

五言古風

古離別

迢遞君遠遊纏綿妾孤傷  
年年望君還悠悠空斷腸  
我願陵成江有車不得襄  
江復變為陸無水通舟航  
成江

路還通變陸路更長安得微賤軀乘風墮君傍化為舟  
與車載君還故鄉

團團素明月隱隱流前除卷帷對孤影涕泗沾羅襦念  
我玉闌人此心知焉如何方得靈藥託身為蟾蜍懸光  
萬里天往尋君所居君坐照君席君行逐君車

道傍兒

落日古道傍依依聞哭聲云是田舍兒垂髫纔九齡前  
母久已沒後母無復情飢寒夙所更驅役不得停甫課

南山樵父督西疇，畊蚤汲或至晏夕。春恒達明曾何少，  
懈怠動輒遭笞刑。斑斑膚無完，恍恍神不寧。命也可奈，  
何？怨辭安敢形？但願後母心回慈，念孤生遲我齒力壯。  
與母供使令，余聞重嘆息。為汝雙涕零，憑誰絃履霜。彈  
與汝母聽。

桐華

絕岸有孤桐，日受藤蔓侵。芳韶歇頰紫，餘暄始相尋。粲  
粲白玉花，照見清溪潄。時至聊一吐，豈有東風心。乾坤



寄孫枝隱隱孤鳳吟安得太古手為斲重華琴奏之巖  
廊上和以簫韶音惜哉此妙質歲晏娛空林渺渺蒼梧  
雲興懷一何深

夢真三首

昔夢驂八駿往赴明宮昭朝發赤水陽夕抵崑崙椒恭  
陪瑤池宴親聆白雲謠雲來何英英雲去何飄飄山川  
悵悠阻樓臺空閒寥想像雲和笙青鸞度秋霄

昔夢拜綠章縹緲朝紫微鈞天侍清燕寶書析玄機錫

之瑤碧簡賚之青霞衣微班司玉條下糾濁世非還家  
未中道翠水烟塵飛朝真諒無期丹忱日依依

昔夢過宛洛遊戲芙蓉城道逢王子晉邀我升天行翩  
翩控鶴駕依依吹鳳笙銀河未西流翩然倏遐征碧挑  
開晚花緱山空月明

寶劍化

我有二奇物太阿與龍泉床頭雷吼匣屋角虹貫天刺  
虎如切瓠斬蛟猶截絃神光未獲試所遇乃不然時平

會銷兵一笑甘長捐瀉茲太古水早被洪爐烟化身作  
農器往斷南山田元炁還不死為人作豐年

社日雨

今社來無涯古社喚不回社公亦世情兒劇良可咍新  
水豈不佳舊雨令人懷離離芳草生澹澹桃花開吾甃  
不須治聊復盡此杯

醉中放言

一器集百蚡分寸爭營營醉鄉有太古長年樂昇平尚

不知揖讓固應無戰爭吾嘗涉其境信美不可名遺我  
度世方南遊釀滄溟蟠桃以供核釣鯨為之羹小醉五  
百年大醉三千齡俟其變桑田翩然却歸畊我畊不藝  
秣還以供瓶罌哀哉彼衆狂何不促我行汝行未宜遠  
小駐中山程中山有神醪千日醉不醒三十六番醉亦  
足了汝生

負暄吟

陰風吹蘆花鋪錦滿汀洲不充赤子襦露肝寒蕭颼煌

煌扶桑君懸鏡燭隱幽惻然冰霜晨被以絳錦裘窮閭  
一欠伸僵體回春柔天衣難久戀向晚復下收南山拾  
枯樵寒夜為衾稠灰冷更正長展轉何時休東方行且  
明小忍君勿憂

城中別徐山玉先生歸歸後奉寄

北風走平湖枯荷鳴索索握手出城東歸鳥日欲落人

事當語離抱懷寧不惡孤帆煙雨舟恨不同李郭

山玉  
拉子

同舟余得  
便舟先行

吾嘗評此子宜置在丘壑可憐西極馬俯首

受羈絡何當稅彼駕與子翔寥廓結廬溪水上日夕對  
郭璞清曉林霏開碧玉峭如削青鞵動高興安得踐斯  
約尊酒不復攜巖泉清可酌

雜詩三首

后稷播百穀粒茲阻飢人新苗化為舊舊種還為新萬  
代一粒傳何嘗失其真君看田中秋穗穗上古春太極  
生天地同是有吾身吾身千世前親見羲與神不失赤  
子心是即無懷氏云胡逐顏運澆浮散其貞良苗不自

殖甘與羹稗倫勉哉畊我田歲晚收陳陳

丘嫂禮金印故妻赧朱輪區區富與貴祇可夸婦人彼  
婦一何愚所羞惟賤貧安知藩間妾覩此泪沾巾蒼蒼  
鹿門山高風清絕塵

西域去中土荒徑無人開誰眩武皇意極力致龍媒汗  
血竟何用空聞悔輪臺茂陵土花碧石馬秋風哀悠悠  
數世後引得金仙來

過浩山

高樹停歸雲峭壁下落照北風一萬里絕頂吹野燒行  
行念高堂履險心欲掉茅茨者誰家喧語雜老少開門  
止我宿四壁亂蓬藿自言兵火餘零落僅餘噍世故莽  
難詰濁酒寄一笑月黑雲冥冥屋頭聞虎嘯

別何復初教授

貂裘日以敝滄海理歸舟戀友那忍別思親詎敢留豈  
無還家樂而懷索居憂北風吹大江江水日夜流吾道  
莽何之天運良悠悠安得兩黃鵠與子仍丹丘



金方山先生集 卷二  
陪外舅謹齋泊雅山準軒三吳先生遊西園摘新  
茶汲泉煮之香味殊勝焙者

雲根得竒草金芽擷芳鮮石鼎生古瀾松風語寒烟雖  
微龍鳳製而得雨露全玉塵飛素濤信美非其天臨風  
勿浪吸侑以離騷篇

庚辰六月陪謹齋準軒雅山游西禪超師院以柳  
詩道人庭宇靜分韻約有興即賦余得庭字時  
小寐禪床風雨適至遂賦字字

小憇西禪床謝絕半日暑白雲憐倦客清陰覆停午  
嫋陂上風沉沉竹間雨幽幽一室虛昵昵羣葉語冥搜  
得竒想熟寐透淳古九衢喧野馬萬喙爭腐鼠誰能大  
槐根擺落半柯土浮生得今辰幽期况茲宇延緣欲忘  
歸落日齋堂鼓

過太白墓

下馬弔太白壯心重徘徊秋風吹破墓晚氣生孤臺四  
百六十年詩魂安在哉神人豈久謫旋復御炁回元無

采石船而況青山堆攘臂競真偽世儒良可咍煌煌長  
庚星光射天門開攜樽立遙夜勸子鸚鵡杯

壬午再過西禪超師化去一年追感遂賦庭字

昔詣超師院聽雨眠疎櫺微吟得深警小淪開孤醒四  
極何浮浮纖鳥飛不停重來未三年孟度已西溟巾屨  
空掛壁芳草綠滿庭嘉樹亦剪伐霜幹無留青人生意  
何常孤月行秋冥適來偶流輝倏去還韜靈旦暮不足  
計惜爾猶典刑感慨誰與共晴簷語風鈴

道過徐山玉吳仲退來會宿別後作寄

扶輿跼殘照懷人度青林一笑得二妙坐看西月沉短  
燭搖古碧華樽湛芳斟高歌擊唾壺琅琅出商音東風  
行空山和以蒼松吟飄飄洞庭樂要渺南薰琴天地空  
濶遠歲晚誰知心相對成浩嘆忘言擁單衾東方忽已  
白握別西山陰違離未云遠懷思一何深常恐蕙帳空

此樂難重尋

時山玉將  
赴學官

種蔬二首

可憐黃鰥鰥役役秋畦畊既以謀我飯又復謀我羹  
暮一束芻所報良亦輕飽食輒自媿悠悠念吾生  
夫人肉食謀所喪甚於飢但能咬菜羹何事不可為  
采首陽巖熒熒商山芝此味千載長雋永當自知

題李庭秀學隱山房

燕坐萬書圍高吟八窓空是間足佳處何用丘壑中  
南山有玄豹翠霧澤茸茸一朝文章成平林嘯秋風

過太常寺簿謝公故第公名章字華卿蜀人寓居

南康丞相方叔之姪自號虛舟咸淳中任國子監  
簿上殿抗疏斥賈似道遷太常簿拂衣歸廬山以  
國子丞召除知辰州俱不赴海內高之丙子及難  
弟為水驛云

落日廬阜紫飛砂湖水黃散倦登古原含悽眺層岡丹  
梯遂寥邈

闕

思熱中腸當年扣玉墀抗疏何慨

慷慨拂衣雲壑卧著書名山藏築園印清流藝樹條孤芳  
英彥集文字燕席開華粧人生既難料天運亦靡常黯

黯玄雲陰蕭蕭北風涼山流鰲背空柯改蟻夢荒事往  
蹟已陳名存道彌光獨念平生遊使我重感傷破壁嘶  
瘦馬疊鼓發暝航屐痕難重尋寒苔日蒼蒼高丘渺煙  
霧不得酹一觴懷哉我先銘

公銘先  
考墓

翠琰垂千霜俯仰

落清泪目斷江流長

憶巢雲居

君名鏌字德開姓徐氏蜀人謝相以女姪妻之  
依虛舟居南康工詩善畫嘗領鄉舉當赴特科

不就甲戌九月以疾終諸事皆不及見云

棄家錦宮城結屋廬山前退鷗空悠悠冥鴻自翩翩吟  
章一傾益見賞朱絲絃及此再承晤交情重纏綿冥賞  
富雲壑清聽窮風泉携壺流雪臺吹笙落星船重陰閔  
華景平陸成修川君應有先識化鶴不待年重來訪舊  
隱滿目空悽然琴書竟奚屬詩畫知誰傳拊懷重感嘆  
回首還延緣摇摇松梢雲疑是巢中仙

過干越宿熊氏澹園偕東采駕閣西玉國正二同



年登羊角峯觀天池訪昌國寺陸羽茶竈拏船

過琵琶洲迴延休觀聽琴記遊四首

錄其二  
其四

倚策試新晴扶搖上羊角山空葉自語天近雲欲落危  
亭渺何許高木黯猶昨悠悠念物化漫漫悲世濁何當  
擊天池與子翔寥廓

當年曲江燕並醉西湖舟芳夢故依然落花水空流今  
晨定何朝聯裾此夷猶暄風不驚波小泊琵琶洲無人  
度新音松聲澹蕭颺却回羽人觀復為瑤琴留俯仰信

多感逍遙且忘憂幸無商人船喚起青衫愁

登聚遠亭

思陵所書東坡雲山煙水一絕宸翰在焉

枯筇倚落日危闌眺西風溪水清練練雲山碧叢叢仰  
視天宇濶俯瞰塵世空謫仙有妙音飛入蓬萊宮鈞天  
動清聽雲章照晴虹故殿已秋草茲地猶青松雙龍護  
璽文德壽殿書塵暗珠絲蒙徘徊幽賞感慨懷深忡萬夢  
天地老一笑今古同自攜白團扇悠悠遺飛鴻

同齊節初遊吳園登四時佳興樓有懷張史君張  
史君名洪字伯太仕至尚書郎知徽州府余不及  
識君嘗和其所賦平遠十絕辱惠書報以古體三  
章且約予一會未及赴而君捐館矣詩有云長鏡  
白木柄茫茫走天涯寧知屋角松流膏藏龜蛇醫  
和不可鑄空林芳菲菲六丁護香珀千歲以為期  
余不足以當此錄之以著不忘

澹澹池中華離離池上樹緬懷龍山翁婆娑此成趣相

招桃源舟蹇予莫能赴翁今為飛仙乘雲還帝所歸燕  
隨秋風翠樓渺煙霧會面良獨難知心那復遇空餘千  
歲懷冷落香珀句平原若為繡鍾子安可鑄蕭蕭衆芳  
盡冉冉流年度浮生欲如何三嘆出門去

重陽雨與湯叔吳諸公齋亭小集

初余撫竒節賞事彌穿巒幽躋幾屐換豪飲百榼乾詎  
知中年至況復行路難林谷深且窈巖岫繞復攢叢疑  
熊豹伏穴惴龍蛇蟠晝雨已冥冥夕雲亦漫漫升高躬

易危居卑心所安蕭齋豈不陋英集聊相歡東籬獻初  
華西風被戎冠汎汎茱萸觴落落苜蓿盤接此造極談  
勝彼登峯觀終然有深懷悠哉發長嘆泰華采香雪小  
山訪遺丹憑誰吹玉簫雲外呼青鸞

夜泊彭蠡風大作

卸帆月欲墮泊岸風轉急驚砂傳鐵箭飛霰散瓊粒重  
湖太古水帝遣龍下吸潛鱗失故穴蒼黃望舟入寧知  
政坐窘衾裘盡沾濕慌慌中夜起莽莽百憂集披衣視

雲漢慘淡天一笠頗疑廬阜倒三嘆救何及平明笑擁  
篷五老猶壁立

湖上被水有感二首

汲汲湖上叟種瓜湖上園晨夕自抱甕長此蒼玉丸所  
希烈日中消彼行人袪垂垂一月雨平陸白浪翻屋廬  
且已沒根蒂那復存初心竟何如天意吾奚言

天公亦兒劇日縱驕龍嬉弄翻鬣上瓢一壑共渺迷交  
交蛙出竈洋洋榻浮龜居者既憂墊行者復蹈危覆舟

誰氏婦滅頂誰人兒

是日浮梁南二漁家覆舟  
有小家子渡戴堤溺焉

一戲遂

如許高高那得知龍驕未易制天劇不可為

送司命君

楚俗相傳竈君以歲暮登于天凡人間媿惡事  
必具奏焉祠之唯謹為作此以送神

玄鶴導飈駕黑螭載雲旂云是司命君歲暮當賦歸欲  
將人間事媿慝奏玉扉昊皇倘垂聽瑣瑣安足譏一冬  
天氣燠占者疑匪機野蔓既碩綠山桃還僭緋稍稍痴

蚋集紛紛凍蠅飛願言剪銀河雪花玉成圍驅厲濯春  
瘴竄蝗銷歲饑青君且戒嚴疊疊欲近畿斯人有至望  
此事宜速祈君言或見用帝力亦巍巍一觴贈君行願  
君聽勿違

東軒白芍藥盛開

宿雨卷餘芳庭戶綠陰靜玉仙從何來服佩淡如瑩迎  
颺薰自遠承露色彌正尚嫌脂粉浣肯與頰紫競姚黃  
花中尊擇配此其稱寰塵暗京洛偃蹇誰敢娉當年廣



陵譜艷賞非不盛脩然林下風政以道韻勝過期知益  
希含章隱希病斜日下游蜂一笑闌獨凭

夜大風明日視新竹無恙

墻陰老龍孫氣欲干雲霄共愛秉勁節終虞忌高標東  
風撼南極萬壑翻江湖挑燈不成寐念爾心搖搖天明  
報平安阿龍故自超山翁喜欲狂呼童傾巨瓢舉酒壽  
此君不飲吾當澆

雜感六首

淒淒寒露下疊疊孤蛩吟幽人起徬徨嘆息泪盈襟物  
情正得時我悲獨何心

翩翩田中雀貿貿墉下鼠朝來啄我粟暮來食我黍羸  
牛卧墻陰枯莫鬧風雨

讀書不救飢山園聊荷鋤蔓既荒我粒草復亂我蔬大  
笑非吾事忍飢還讀書

元陽秋轉碧積凍春更好草力乃如斯人生得草草寒  
暑浩茫茫哀哉未聞道

孫子傳世世木石窮年年太行亦可移滄海終欲填入  
聖諒非難懼君心不堅

一根起千枝一枝吐千花花復結為實種種春無涯開  
門掃秋風閉關養靈芽

樹垣

開門俯清池樹垣因古坡經營既鹵莽葺補還蹉跎前  
冬雪如山去春雨如河幾微不自慎迨茲功力多倚杖  
寄三嘆反躬當如何

去草

佳花日封溉惡草時剪嬖花事猶未緒草意復已高三  
嘆謂老圃不得償秋毫榮悴豈其天置之聽所遭老圃  
顧我嘆吾豈讐芳蒿茲圃吾所職不爾毋乃叨君言固  
近厚吾躬敢辭勞

伐木

牆角有惡木據我千畝園蔽虧日月光壅遏雨露恩其  
下草不殖況乃蘭與蓀蒼藤交龍蛇護擁何雄尊厨人

告薪絕命斧急剪髡終然非遠圖會當拔其根

除棘

萬甲綠未動棘叢已蓁蓁所害雖尚微剪薙當及辰舍  
鋤忽三嘆念爾亦一春是中留復難惻然為之顰築垣  
俯清池池上插柳青誰能限芻牧徙之池水濱柳吾所  
甚愛護柳吾不嗔美醜無棄材位置固在人豈特遂物  
理亦以成天仁

遷椒

椒性惡卑濕種之必陽坡托根苟失所美質其奈何及  
蚤遷高原薰風丹實多

春社同梁必大湯景文徐山玉吳昭德吳仲退李  
思宣周南翁飲芝山五峯亭二羽士來會以范  
文正公雲飛過江去花落大城東分韻得雲字  
戊雨敷雉甲午晴沉幽薰時邁足永慨景舒聊暫忻聯  
履得英彥携壺出塵氛亦有丹丘客共眺青山雲芝空  
石磊磊華落川沄沄代遠弔殘栢忙勞念遺扮吾生竟

何如茲飲又及曠萍流豈易合星聚還當分深憂愴范  
老長謠言廬君邂逅有千載寧無感斯文

晚晴

歌枕聽殘雨開門看東風春光無尋處天地綠氣中初  
旭散平野快酒瀉怒洪關關枝上禽舒舒葦間蟲東郊  
歡且謠秉耒開歲功緬思陶唐化坐致黎民雍斯時諒  
奚如殆與新春同愚生後千載不並稷契逢唯應杯中  
物上與邃古通取酒且竟醉山花舒早紅

集陶句題吳雅翁心遠堂

居止次城邑性本愛丘山曲肱豈易冲靈府長獨閒秋  
菊有佳色綠酒開芳顏羲農去我久千里乃相關遙遙  
望白雲高操非所攀願言躡輕風八表須臾還

張子房

早見滄海君晚師黃石公力士不得力驅使芒碭龍仁  
義以為推氣蓋百代雄一擊函谷碎再擊烏江空從容  
一籌畢全漢酬其功何乃不自知而以留見封鄼侯辱



械擊淮陰嘆藏方彼皆為人役詎敢望此翁辟穀豈其  
然視世與穀同可憐商山老亦墮子術中

夜讀馬援傳感少游語

生人有恒道衣食固其須裁足諒已難况復求贏餘所  
以古聖賢守道甘窮居緼袍敝弗厭簞瓢飢自娛徐行  
豈不安焉用馬與車掾史亦良勞抑首畏簡書放曠山  
澤間孰與從樵漁無求恒泰然有繫還多虞但當力為  
善汲汲希舜徒于然守故丘庶不忝厥初寄語馬少游

斯言定何如

杜門

有客扣我門丁丁如啄木久立門不開客去嗔此屋僮  
奴亦怪我無事許畏縮向來豪俠場門外車接轂將無  
晚乏具效彼龜藏伏山田歲將收亦可飯脫粟不厭客  
來頻所厭客論俗豪辨既多違強應還自慙但恨平生  
友歡聚不得足存者隔川途沒者卧丘谷精微向誰剖  
鬱結滿心曲何如掩關坐黽勉抱吾獨揮絃送征鴻悠

悠楚天綠

讀書

卧疴雲林下家寂誰與居高風下木葉泠泠晚窓虛忽  
思往代事聊披案上書始得暫欣然稍久嘆以吁衝冠  
或憤激反袂還欬歔拊卷忽自嘆母乃狂且迂此何豫  
爾事况復千載餘來今正綿綿爾心復何如有懷不自  
展乃挾冰炭俱因此得冲靜萬念悉掃除巖花吹幽香  
清酒堪滿壺且復舉一觴冥然聊自娛

題汪氏插梅圖卷後

插梅元無梅春風從何來  
茕茕高樹起燦燦繁花開  
向來孤山老鋤雲親自栽  
寧知歲年晚更受雪霜推  
用意不食實無心或成材  
天工未易窺人力胡為哉  
掩卷既三嘆今古寧獨梅  
終恐事偶然願君更深培

孟使君餞行即席以幾時  
杯重把分韻得幾字

平湖澹微雲小雨涼衆舟  
歸懷重依依把臂還疊疊  
昔別念彌深茲聚知復幾  
離觴不忍銜清風在船尾

飯石壁下逢僧附船還叫巖寺明石山如平臺曰  
赭亭山也僧至巖下飲要余同遊舟已去矣

晝飲石壁下蒼蒼雲樹寒忽逢一僧來欲趁扁舟還云  
住叫巖寺共看赭亭山揮袂忽而起絕磴躋復攀揖我  
少輟棹步涼同扣關日落南風起不知流下灘

甲午九月留浮梁與鄭瑞卿吳可翁方玉父方可  
大晚出郭飲溪上古樹下以黃葉覆溪分咏得  
黃字

歲晏天蕭蕭日落山蒼蒼尋幽度小澗眺遠躋層岡班  
坐古道上落葉滿地黃行人去自急歸鳥栖亦忙偶茲  
一餉間慨彼千劫長知愚各有殉博策俱忘羊人生今  
幾晨聊復盡此觴

田間

牛羊散空烟鳬鴨滿平坂扶藜度西麓脫屣涉南澗行  
觀頰肩獲坐媿綠陰飯田毛信靡贏井稅亦可辦隔籬  
新釀熟要客一笑粲寂寂寧少悵炎炎故多患但願長

如茲聊爾娛歲晏

村居晚思

清風起層陰涼雨放疎點  
衆木鬱蒼然芳草綠萋萋  
山深無來轍寂寞荆扉掩  
念遠悵悠悠殘陽在西崦

同吳仲退周南翁登法雲寺志上人流玉閣

偶與幽人期頗愜滄洲趣  
嵐影倒虛碧天光澹晴素  
煙橫雙鷺起水落孤帆度  
凭闌足清眺隱几得玄悟  
顧茲半日閒媿彼經年住  
更遲雪中來臨風看琪樹

次韻吳雅翁秋懷四首

蟋蟀鳴空堦疊疊昏達曙感此不成眠推枕覓長句物  
情欣得時我乃獨不遇悠悠經世心歲晚付農圃長歌  
幽七月掩卷泪如雨微虫亦見錄老我吟謾苦周公不  
可夢哀哉弗如汝

憶昔登王畿花柳春爛爛芳年親與朋美酒夜復旦參  
差隔世路荏苒歲華晏荒地芳草平廢殿濕螢暗念當  
弔陳迹誓以鑄門限仙人詠城郭釋子說夢幻宇宙幾



秋風悠悠復何嘆

蒼忙遺二老

謹齋  
準軒

俯仰近十秋松栢推高岡鳳麟隱滄

洲吾道遽如許斯人安可求當年西門路感涕吟山丘  
矧我於韓門忝與李漢儔遺文念當序舉筆心先愁歲  
寒賴有公名節姱以修願言愛體素一柱迴狂流天倫  
豈不傷天運良悠悠

西風吹梧桐一葉墮寒玉飄飄轉千厓疊疊侵萬木霜  
露行復降雪霰飛相逐幽居感時運清夜理商曲堅冰

信當辨昊天有反復但使本根在陽回奚待祝詞人樂  
光景纖艷不足錄焚香對秋山自取周易讀

此張希良書齋去祖壠不百步扁曰望松取后山  
思亭記中語也

老根憐蒼龍芳粒長新穉睠言丘中人苓珀共千歲晨  
瞻露華明夕眺煙影翠捫軀發深感矯首落孤泪思亭  
有名言世守宜勿替

溪上桑葉螢食已既今年蠶事頗落寞

沿溪十畝桑綠葉敷且腴朝採不盈筐暮視唯空株乃  
知飛螢來竊食無復餘汝飢既去饜蠶飢當何如豈挾  
照書勞我困正在書喫衣諺所笑

見東坡志林

思灸計復虛

僮奴日捕拾囊獻如囚拘塵編眊難覩乾死氣亦紆政  
爾可得盡一笑清霜初清霜幾時來我亦寒無襦及時  
且封溉勗哉為後圖

庚寅秋病得語不復詮次名曰感懷

炎夏忽已變西風飄然秋親友日已遠坐感歲月道登

高明不見涕泗滂沱流天高雁未來落日空悠悠願為  
西北雲萬里從之遊

祖龍制八極法令如亂麻儒冠委秋山王畿明朝霞所  
以武陵人入山種桃花如何東陵侯苟此旦暮華堂堂  
炎漢叟却種青門瓜舒卷迷大運千古為悲嗟

連雨鬱蒸夜不能寐

閉門十日雨簷溜如泉聲沈陰晦蘭燼潤氣蒸挑笙饒  
蚤既跋扈饕蚊復縱橫展轉強就寐草塘蛙亂鳴亦知

夜漏促安得曙色明晨鐘度深竹雲岫開新晴隱几補  
前夢暫喜身境清聒耳蟬嘒嘒沿睫蠅營營所響輒如  
此吾生安得寧感嘆還失笑此物方施行天運如循環  
轉眼秋風生

山中視穫

歸馬起暝壑微燈耿深竹農翁具雞黍要我林下宿共  
談隴畝事未語眉已蹙邑胥邇來稀每漲卷平陸山中  
復小旱一雨僅半熟舉酒屬乃翁微笑以勝哭湖鄉爾

何知瀾漫正吞屋且共盡此觴人苦不知足

忠烈侯酷好山水作葬書以行於世元翁其族子  
傳其書侍父仕贛上盡得楊氏術凡談陰陽家者  
見之輒屈膝余聞其論洒洒然起忘倦矣夫既謂  
之地理理非儒不精元翁儒者精於理固宜為賦

彭大雅號太極翁  
封忠烈英衛侯

英英太極翁器明吳楚甲馳輅使沙漠杖鉞帥巴峽南  
瞻嶺表縮東睨溟漲狹林居念環轍簡脫卑藏筴夫君

玉樹彥同祖寶劍匣

寶劍出匣  
彭氏祖墓

六籍既淹通異聞更博

洽姬公卜宅洛成后鼎定邾理也匪荒唐古毗遺檢押  
支分景純書嫡出楊氏法蒼蒼鬱孤臺仙枝竹林挿芳  
春適游衍千金日娛狎厚坤行萬龍立特飛次夾幽幽  
何綿綿意脉能擢搯神文遂爾授玄鑄了然肱俗師守  
橐囊犀喙鬧鳬鴨青霄孤鶴唳未吐氣先壓蹇予少狂  
走黃塵滿烏恰山川子長筆天地伯倫鍾某丘可以老  
白石盟願軟祝君昌茲術四海救貧乏

山中夜起月色皎然

倦寐不知夜開門風露深明河掛屋角月出東山峯雙  
犢卧啮草滿地梧桐陰蔌蔌墮落葉翻翻動栖禽浮生  
諒餘幾兩鬢黃塵侵偶此值清賞冷然得初心幽隱良  
足尚吾盟在雲林

晚晴欲適西村不果

雨歇無餘春草木忽而長東風吹曠野千里綠莽莽夕  
陽澹微明命策赴幽賞徘徊石上坐鬱鬱念疇曩子規



叫重雲意散不復往

學圃

西園藝我麻南園樹我桑東風吹時雨青青久成行春  
服朝猶賒大布冬可裳十年湖海役塵暗貂裘黃魯無  
一事成祇取三逕荒何如老農圃卒歲心不忙隣翁取  
余喜笑語傾壺漿擇術子已卜守之慎勿忘

三月二十九日還家花事已過獨碧桃盛開

出門紅未芳還家綠成幄仙葩獨婉婉書聲共寥落日

暮碧雲合天寒翠袖薄念遠悵悠悠縹緲山紗孤鶴

九日和陶

開門見秋山忻然如故交煙雲淡相媚卉木青未彫茲  
遊忽自念誰與為登高目涉已千仞神遊還九霄世短  
奚足嘆意多亦徒勞奈何怨遲暮况復懷覆蕉至樂豈  
必酒天真自陶陶長吟對寒花萬期猶一朝

春雪

青神怯春寒頰紫染未辨臨河來素女剪冰作花瓣銀

屏移佛地玉樓墜仙漢朽株繳瓊瑤斷甃化圭瓚東風  
翻覆手轉眼忽吹散乃知太空中何物當把玩開門見  
青山且喜還舊觀

我有綠綺琴

我有綠綺琴寶匣生蛛絲拂拭聊一鼓意淡音愈微隱  
几忽自笑持茲將付誰所以絕絃者痛惜無鍾期吾人  
天與遊豈在知音知惆悵簫韶遠不見鳳來儀后夔不  
並世已矣奚所悲

贈初心相士

王識九江黥侯許平陽奴臭奇恒互出冠屨奄相踰此  
說偶奇驗人人生妄圖曷不返吾照湛然觀本初天地  
付我形森列萬理俱形拘有枯苑理充無智愚塗人可  
以禹為善即舜徒奈何遺此心豢此尺寸膚君顓唐舉  
術乃取荀卿書論心不論形名象足啟余宇宙共一軌  
紛紛落迷塗願言述吾語一呼旋其車

泊三江口

金史四庫全書  
卷二  
潮寒聞雁聲野霽見虎跡眼中無故人莽莽欲誰適當  
年此防秋築壘如鐵壁哀哉不崇朝遽此陵谷易土道  
蝕殘磚沙草埋折戟林墟稍亦集農畝猶未闢人心嗜  
新樂疇復念曩昔亭亭千尺塔獨立蒼烟碧稽首塔中  
仙此心如鐵石

泊雷江口

解纜風雨息傍晚復大吼浪如雪山來船作騎馬走魚  
龍欲作勢問予驚怖否那知狂書生有胆大如斗莊周

論天地我見僅如缶可憐一勺多浩蕩夸已有大方付  
一笑河伯亦俛首天開鏡面平蕩槳泊江口新月照船  
牕烹魚醞我酒

虎溪三笑圖

陰壁摻苦竹秋池淡芙蓉二老廬山間風味夙昔同亦  
有栗里人心事黃花叢囊中無一錢眼底四海空羲皇  
未渠慚上與無懷通衆羽集新條雲霄一冥鴻淨社亦  
可人念爾名教宗博酒空勤渠攢眉一聲鐘蒼苔片石

在醉卧空山中良辰入奇懷杖屨閒相從偶然出岫雲  
儵爾風飄蓬虎溪有嚴禁詎敢待此翁行行不知遠大  
笑分西東風流一時散千載留高踪溪光與山色隱隱  
尚笑容笑意果何如畫史安能窮按圖付一嘿翳景生  
長松

避暑招真觀聽琴

驅車畏火傘投扇倦風簃起行青松徑往就白雲榻窈  
窕一壑深蒼蒼兩崖夾玄菟獐爪齒白龍老鱗甲竹樹

擁青摻花草靄叢雜渺沫洒空巖冷颼下危峽始知忘  
解帶久坐思御袂丹丘逢羽人瑤琴開寶匣古意鬱蒼  
茫秋風淡蕭颯悲蟬為噫吟鳴鶴相和答歲華坐晚晚  
塵路嗟隘狹飛仙倘來歸遺我度世法



鄱陽五家集卷二